



Affischa

Suprastanza cumünala dals 23.09.2024

Presidi: Riatsch-Fedi Fadri
Partecipant/s: Cantieni-Lanfranchi Andri
Kirchen-Werro Armon
S-chüsà: Peer-Puorger Victor
Caviezel-Domenig Ursina
Protocol: Poo Christian
Fabrica: Paulmichl-Rodigari Albin
Gias/s:

tractandas	tema	responsabel
1	0120 Executiva Acconsentimaint protocol	
2	7900 Planisaziun dal territori Revisiun totala da la planisaziun cumünala Posiziun dal cumün sül rapport da l'uffizi per il svilup dal territori	tuots
3	0120 Executiva Orientaziuns	
4	0120 Executiva Varia (suprastanza cumünala)	

0120 Executiva

135 Acconsentimaint protocol

Il protocol dals 26 avuost 2024 vegn approvà.

7900 Planisaziun dal territori

136 Revisiun totala da la planisaziun cumünala

Posiziun dal cumün sül rapport da l'uffizi per il svilup dal territori

Causa assenza dal capo maina il vicecapo, Fadri Riatsch tras la sezzüda. El manzuna, cha cun charta dals 4 gün 2024 ha l'uffizi pel svilup dal territori comunicà al cumün lur valütaziun e posiziun sülla documainta inoltrada per la revisiun totala da la planisaziun cumünala.

Tuot in tuot es stat il rapport d'examinaziun positiv, tscherts puncts però eir negativs, quai cun argumaints chi nu cuntaintan al cumün.

Adonta chi'd es gnüda redotta la surfatscha da la zona da fabrica es l'uffizi da l'avis, cha diversas parcellas illas fracziuns da Vnà, Ramosch, Strada e Chaflur ston eir gnir exclusas da la zona. Cul svilup e l'actività da fabrica d'ürant ils ultims 20 esa cler ed evidaint, chi bsögna la surfatscha totala propuonüda ed eir approvada da la radunanza cumünala. Resta l'actività eir d'ürant ils prossems ons medemma, impustüt illa fracziun Ramosch, gnaran las parcellas amo libras surfabrichadas infra pacs ons. Implü s'ha eir diminuida la disponibilità dad edifizis existents illa zona da cumün per realisar spazzi d'abitar marcantamaing, quai culla vendita o causa ierta da seguondas abitaziuns. Per diversas parcellas a Ramosch ed a Chaflur es fingià avantman l'infrastructura bsögnaivla, eir sun avantman progets da fabrica concrets. Quai sun motivs, cha talas nu das-chan gnir exlusas da la zona. Culla pretaisa dad abolir la zona da reserva illa fracziun da Ramosch va la suprastanza e la cumischiun da planisaziun d'accord. In quel lö nun es amo avantman ingün'infrastructura.

Sper il surmanzunà vegn muossà via sün adattamaints da las zonas da funtana, dal spazzi d'aua e da l'ur da god. Singuls cas sun gnüts approvats be i'ls ultims ons dal chantun, o lura sun tschertas revisiuns parzias amo in elavuraziun. Il cumün giavüscha da resguardar quai, in möd chi vegn approvà tenor plans e documainta inoltrada. Ils adattamaints seguan plü tard.

Implü ston gnir correts singuls sbagls fuormals da la ledscha da fabrica e pro tscherts plans. Quels sun gnüts fats dal planisader.

Ün punct fich important, sül qual il cumün instà in tuots cas, es il traiget da la via da velos tanter Ischla Rov e San Niclà. Il plan general d'avertüra cuntegna il traiget da quella via da la vart schnestra da l'En, quai lung il trassè existent da la loipa da passlung. Causa privels da la natüra sto la via tanter La Resgia e Raschvella gnir serrada adüna daplü, eir nun es la muntada da San Niclà sü Raschvella adattada per transir cun velos. L'uffizi es da l'avis, ch'üna translocaziun da quella via nu sarà pussibla, impustüt causa las zonas da protecziun da la natüra.

Tant la cumischiun da planisaziun, sco eir la suprastanza approvescha la posiziun gnüda preschantada. Quella vegn protramissa a la collavuratura e respunsabla da l'uffizi pel svilup dal territori. In seguit es previssa üna sezzüda cun ella a Cuaira, sperond da tilla persvader cullas argumentaziuns e surgnir uschè glüm verda per dar inavant a la Regenza, quai fin il principi october.

L'approvaziun da la revisiun totala da la planisaziun cumünala stess succeder amo quist'on.

0120 Executiva

137 Orientaziuns*Preschentscha dal uors in vicinanza da l'ös abitats**Privel potenzial per la populaziun – respunsabilità ed eventualas masüras da sgürezza*

Andri Cantieni dumonda, schi'd es entrada üna posiziun davart da l'uffizi da chatscha e pes-cha sülla charta dal cumün. Il manader d'administraziun orientescha, ch'el haja gnü contact cul manader da l'uffizi. El salüda l'intimizaziun dal cumün a regard la sgürezza e protecziun da la populaziun. Tenor il concept saja differentas definiziuns, i's discorra dad ün uors da maniera discreta «unauffälliger Bär, dad ün uors chi chaschuna problems «Problembär», o lura, il plü mal cas d'ün uors cun ris-ch "Risikobär". Els han valütà la situaziun, i'l cas dal uors a Valsot as stratta dad ün uors da maniera discreta. Pel mumaint nu sto gnir reagi e gnir trattas masüras da sgürezza.

I fa garanti sen, dad infuormar la populaziun davart la situaziun dal uors, sur dal cumportimaint necessari e sur da masüras da protecziun ill'agricultura e pro'ls apiculturs. Il cumün resta in contact cul guardgia chatscha respunsabel.

Plazza per üna collavuratura/collavuratur implü per l'uffizi da fabrica e l'uffizi tecnic

Il manader tecnic manzuna, cha fin uossa nu sun entradas amo ingünas annunzchas per la piazza surmanzunada. Il temp d'annunzcha düra amo fin la mità october.

Di da las portas avertas – scoula, biblioteca e plazza da sport a Strada

Fadri Riatsch rend'attent amo üna jada sül di da las portas avertas e la festa da prosma sonda a Strada. Sco president da la cumischiun «ingrondimaint chasa da scoula Strada» spera el sün üna numerusa cumparsa.

Proget rait da fibra da vaider

Il manader d'administraziun orientescha davart il proget per la realisaziun d'üna rait da fibra da vaider (UHB) i'l cumün da Valsot. Per integrar eventualmaing ün import i'l büdschet 2025 sto la suprastanza decider scha'l cumün es interessà da's participar vi dal proget o na. Il respunsabel pel proget e directur da l'EE, Claudio à Porta preschainta prosmamaing il proget a la suprastanza.

0120 Executiva

138 Varia (suprastanza cumünala)

Da la tractanda nu vegn fat adöver.

7556 Ramosch, 02.10.2024



Il vicecapo:

Il manader administraziun: